

# CATAS DE GALICIA 2018

XX CATA DAS AUGARDENTES.  
VII CATA DOS LICORES DE HERBAS,  
LICOR CAFÉ E AUGARDENTE  
ENVELLECIDA. V CATA DAS  
AUGARDENTES DE HERBAS



Organizada pola **Consellería do Medio Rural** coa colaboración do **Consello Regulador das Indicacións Xeográficas das Augardentes e Licores Tradicionais de Galicia**, terá lugar a XX Cata das Augardentes de Galicia, a VII Cata dos Licores de Herbas, e Licor Café de Galicia e Augardente de Galicia Envellecida, e a V Cata das Augardentes de Herbas de Galicia, que consistirá nunha fase inicial de precata ou cata de selección e nunha cata final.

## Bases da Cata

1. Nesta cata poderán participar as augardentes de bagazo, augardentes de bagazo envellecidas, augardentes de herbas, os licores de herbas e o licor café, elaborados en industrias inscritas nos rexistros de elaboradores-enzasadores do Consello Regulador das Indicacións Xeográficas das Augardentes e Licores Tradicionais de Galicia.
2. Os comercializadores que desexen participar coas augardentes e licores nesta cata, deberán enviar ata o día **31 de maio** desde o día seguinte ao da publicación do anuncio da convocatoria deste concurso no Diario Oficial de Galicia, o correspondente boletín de inscrición debidamente cumprimentado ao Consello Regulador das Augardentes e Licores Tradicionais de Galicia. O Consello Regulador certificará que as industrias que se inscriban para participar neste concurso, cumpren os requisitos e condicións establecidas nestas bases.
3. As augardentes e licores que poderán participar son as acollidas á Indicación Xeográfica Augardente de Galicia, Augardente de Herbas de Galicia, Licor de Herbas de Galicia e Licor Café de Galicia. Poderán presentarse un máximo de dúas marcas que se estean comercializando por empresa, debendo estar etiquetadas segundo a normativa vixente e debendo ter sido previamente avaliadas polo Consello Regulador das Indicacións Xeográficas das Augardentes e Licores Tradicionais de Galicia.
4. As empresas indicarán no boletín de inscrición o volume de augardente e licor (litros) que forma parte da partida homoxénea concursante de cada marca que participará na cata concurso, que non deberá ser inferior a **500 litros**. Para a Augardente de Galicia Envellecida e a Augardente de Herbas de Galicia, a partida homoxénea concursante



non será inferior a **200 litros**. As existencias mínimas na industria, no momento da recollida das mostras, serán de **250 litros** da partida concursante para as augardentes e licores. No caso da augardente envellecida e da augardente de herbas, as existencias mínimas serán de **100 litros** da partida homoxénea concursante.

5. As augardentes e licores concursantes poderán estar embotellados ou preparados para embotellar. No caso de estar embotellados deberán estar correctamente etiquetados e levarán a contraetiqueta do Consello Regulador. No suposto de que as mostras estiveran contidas nun depósito con capacidade igual ou superior a mínima establecida, este deberá ter a identificación do Consello Regulador e o propietario disporá da correspondente comunicación de cualificación.
6. Non será admitido ningún participante que nos dous anos anteriores á data de presentación da solicitude, fose sancionado por infracción moi grave á lexislación agroalimentaria mediante resolución firme de calquera das administracións públicas.
7. A identificación e recollida de mostras será realizada pola organización, contando con apoio de persoal do consello regulador, de acordo co programa que previamente se estableza.
8. Dada a gran diversidade existente nas botellas empregadas na expedición comercial das augardentes de bagazo e dos licores tradicionais, resulta difícil conservar o anonimato das mostras, polo que se recollerán en botellas de 3/8 de l.

No caso de que as augardentes ou os licores estean embotellados, do conxunto das botellas que compoñan a partida de 250 litros ou 100 litros segundo proceda, tomaranse aleatoriamente as necesarias para encher catro (4) botellas do tipo antes mencionado e do mesmo lote, que formarán a mostra concursante, procedendo a continuación ao transvasado das augardentes e licores. As botellas levarán unha etiqueta na que asinarán o propietario ou o seu representante e o responsable da recollida de mostras. Para a súa identificación, cada mostra levará tamén un número que corresponderá co número da acta de recollida.

Se as augardentes e licores están nun depósito, unha vez comprobados a identificación do depósito e o certificado de cualificación, procederase ó enchido das botellas e á súa identificación na forma descrita anteriormente.

9. Unha das catro botellas da mostra quedará en poder do propietario, introducíndose as outras tres nunha caixa axeitada que levará como única inscrición o nome da categoría na que participa, que será precintada e transportada ata o lugar da cata, onde permanecerá depositada e debidamente precintada ata a celebración desta.

Da recollida de mostras levantarase a correspondente acta que asinarán o representante da industria e o da organización.



**10.** Para a supervisión da cata existirá un xurado de cata, presidido pola directora xeral de Gandaría, Agricultura e Industrias Agroalimentarias, actuando como secretario un funcionario da Subdirección Xeral de Industrias e Calidade Agroalimentaria e, como vogais, dous funcionarios da mencionada Subdirección e un representante C.R.II.XX. das Augardentes e Licores Tradicionais de Galicia.

**11.** Para a cualificación das augardentes e licores concursantes contarase cun panel de catadores, formado por sete expertos na análise sensorial, procedentes de asociacións, centros tecnolóxicos e científicos vitivinícolas, consellos reguladores de viños, restauración e medios de comunicación especializados, dos que como mínimo catro pertencerán ao panel do Consello Regulador das Indicacións Xeográficas das Augardentes e Licores Tradicionais de Galicia.

O panel de catadores realizará tanto a cata de cualificación como a cata final. Cada catador contará en cada momento co material e elementos necesarios para o desenvolvemento do seu traballo de cata.

**12.** Para a valoración sensorial das augardentes e licores utilizaranse as fichas oficiais aprobadas polo Consello Regulador, sendo as empregadas normalmente para o proceso de cualificación das augardentes e licores amparadas polas Indicacións Xeográficas Augardentes e Licores Tradicionais de Galicia.

**13.** O secretario, e cando menos un dos outros membros do xurado de cata, comprobará as actas de recollida, os precintos das caixas e o número das augardentes e licores almacenados, e procederá a numeralas de novo de forma correlativa. As mostras serán novamente gardadas e permanecerán debidamente pechadas e precintadas ata o momento de iniciarse a cata de selección.

Para a puntuación de cada unha das augardentes e/ou licores concursantes, obterase a media das puntuacións individuais dadas polos catadores que compoñen o panel de cata, desprezando previamente as puntuacións extremas. En caso de empate calcularíase a mediana para determinar a mostra seleccionada.

As mostras cataranse polas categorías definidas no punto 16 destas bases, realizándose os descansos precisos ata a conclusión da análise sensorial das mostras.

As seis mostras de cada categoría con maior puntuación pasarán á cata final que se realizará de acordo co proceso anteriormente descrito.

Establecidos polo xurado de cata as augardentes e licores seleccionados nas precatas, o secretario procederá a separalas, dándolles un novo número correlativo.

As catas finais realizaranse seguindo as mesmas normas establecidas para as catas de selección.



**14.** Finalizada a cata-concurso, o secretario do xurado de cata procederá a identificación das botellas premiadas, tomando nota por escrito das marcas e adegas premiadas, e introducindo o documento cos citados datos en sobre pechado. Este sobre será aberto no momento da entrega dos premios, permanecendo mentres tanto en poder do secretario do xurado.

**15.** O xurado desta cata-concurso coidará especialmente que se conserve o anonimato das mostras en todo momento. O seu ditame nos premios será inapelable.

A entrega de premios realizarase nun acto convocado e organizado para tal fin, ao que se dotará da difusión, transcendencia e solemnidade axeitada.

**16.** Tanto para as catas de selección como para as catas finais establécense as categorías seguintes:

- Augardente de Galicia
- Augardente de Galicia Envellecida
- Augardente de Herbas de Galicia
- Licor de Herbas de Galicia
- Licor Café de Galicia

Se nalgunha das categorías non se contase cun mínimo de 5 mostras para a cata, esta non terá lugar.

**17.** Establécense para esta cata-concurso os seguintes premios para cada unha das categorías:

- 1 Pote de Ouro
- 1 Pote de Prata
- 1 Pote de Bronce

A cada un dos seis finalistas faráselle entrega dun diploma acreditativo e, para os tres primeiros clasificados, un trofeo que identifique o posto acadado.

No caso de que o número de mostras presentadas sexa igual ou inferior a 6, entregaranse un único premio e cando sexa igual ou inferior a 12 entregaranse dous premios.

**18.** Todos os participantes nesta Cata das Augardentes e Licores Tradicionais de Galicia 2018 comprométense a acatar as presentes bases da cata.

**19.** A directora xeral de gandería, Agricultura e Industrias Agroalimentarias ditará cantas disposicións sexan necesarias de cara ao correcto desenvolvemento desta Cata.